

Koleksi Cerita Kanak-Kanak

Wali Kucing 2





Kucing betina itu tertarik kepada Tunggal. Sebentar kemudian datang kucing jantan yang ditunggu itu. Kucing itu ialah ketua kawasan itu. Namanya Calik. Ia anak bekas ketua di kawasan Kedai Payung.

"Siapa ni, siapa engkau?" tanya Calik dengan angkuh.

"Entah! Ia datang ganggu saya," jawab kucing betina.

"Oh, pendatang luar, ya? Hendak mati? Di sini, jangan main-main! Kalau hendak masuk kawasan ini harus minta kebenaran aku," ujar Calik.

"Ini bandar kerajaan. Siapa sahaja boleh tinggal di sini. Jangan hendak tunjuk kuasa," jawab Tunggal. Calik yang berkuasa di kawasan itu terus menerkam Tunggal. Mereka bergaduh. Bercakaran. Masing-masing hendak tunjuk gagah. Calik menaikkan ekor. Tunggal menaikkan ekor. Calik mengangkat kaki dan menghembur belakang. Tunggal turut melakukannya. Banyak juga kucing lain datang menyaksi pertarungan itu.




"Penakut, cakap saja besar!" jerit Tunggal apabila melihat Calik lari.

Kucing betina yang melihat kekuatan Tunggal terus mendekati Tunggal, lalu meminta maaf. Akhirnya mereka berkawan baik. Sejak itu, Tunggal

lebih bebas dan rasa lega. Calik yang luka teruk berlari meminta bantuan kawan-kawannya. Mereka mesti berpakat menyerang Tunggal.

"Kita tidak boleh membiarkan kucing asing itu berkuasa di sini. Kita mesti hapuskannya," kata Calik kepada kawan-kawannya. Lima ekor kucing yang diketuai oleh Calik keluar mencari Tunggal. Ketika itu, Tunggal sedang bersiar-siar dengan temannya di tepi stadium dekat Kedai Payung.

Walaupun Tunggal menemui banyak kucing lain tetapi tidak seekor pun yang berani mengganggu Tunggal. Tikus juga takut pada Tunggal. Kini Tunggal berkuasa di kawasan stadium. Ketika Tunggal bersiar-siar dengan megahnya di kawasan stadium itu, datang Calik dan kumpulannya. Mereka tidak bercakap banyak. Mereka terus menyerang Tunggal.



Berlakulah pergaduhan, satu melawan lima. Dengan mudah sahaja Tunggal dapat mengalahkan kumpulan Calik. Semua kawan Calik lari bertempiaran. Mereka menderita kesakitan. Ada yang dicakar biji mata, ada yang terkoyak telinga, ada yang terkoyak hidung, dan ada yang luka mulut. Calik sendiri patah kaki. Ia tidak sempat lari. Calik terpaksa meminta nyawa dengan Tunggal. Tunggal tidak ada belas kasihan. Calik dibunuhnya.

Nama Tunggal kini terkenal. Ia ditakuti oleh semua kucing dalam bandar Kota Bharu. Semua kucing dalam bandar Kota Bharu jadi anak buahnya. Ia kini menjadi Raja Kucing yang digeruni oleh kucing-kucing lain. Malah ada juga anjing yang takut kepada Tunggal.

Tunggal ditakuti kerana ia zalim dan buas. Jika ada kucing yang cuba melawannya, Tunggal akan ganyang kucing itu habis-habisan. Jika tidak mati, kucing itu akan luka parah dikerjakan oleh Tunggal.

Kalau dulu Tunggol menjadi buruan, kini Tunggol pula yang menjadi pemburu. Ia akan mengejar sesiapa sahaja apabila berjumpa. Dengan keadaan ini, semua kucing dalam bandar Kota Bharu berada dalam ketakutan. Mereka mesti berhati-hati apabila keluar mencari makan. Bagi Tunggol, menyerang dan membunuh adalah suatu keseronokan. Ia tidak senang, jika tidak menyiksa kucing lain.

Ia bersikap begitu kerana ingin membalas dendam terhadap kucing-kucing yang pernah menyiksanya dulu.

Namun, beberapa tahun sahaja Tunggol hidup dalam kemewahan dan keseronokan. Kini, ia sudah semakin tua dan lemah. Tenaganya tidak kuat lagi.

Ia tidak mampu lagi mengejar atau berlari. Malah hendak bergerak pun, ia tidak berdaya lagi. Kucing-kucing lain sekarang tidak lagi takut padanya. Tunggal juga tidak mempunyai kawan-kawan lagi. Semua sahabat setianya sudah lari meninggalkannya. Selama ini mereka menghormati Tunggal kerana takut. Sekarang mereka tidak takut lagi pada Tunggal. Tunggal pula tidak lagi berani cakap besar. Ia tahu, dirinya tidak kuat lagi. Jika ia bercakap besar atau bertindak keras, ada kucing akan melawannya.

Namun demikian, Tunggal bijak. Ia tidak menunjukkan kelemahan dirinya. Ia kini berubah sikap. Tunggal menunjukkan sikap berbaik-baik. Oleh sebab itu, Tunggal masih dihormati oleh kucing-kucing lain. Pada suatu hari, Tunggal menjemput semua kucing datang ke rumahnya. Rumah Tunggal berdekatan dengan Hospital Besar Kota Bharu. Tunggal memilih kawasan ini kerana senang mendapatkan makanan.

Di sini makanan amat banyak. Ayam gulai, ayam

goreng, dan berbagai-bagai jenis lauk dibuang begitu sahaja oleh pekerja hospital. Pihak hospital menyediakan makanan untuk pesakit. Mereka dihidangkan dengan pelbagai jenis lauk.



Orang sakit jarang berselera hendak makan. Banyak makanan dan lauk yang tidak habis dibuang begitu sahaja. Begitulah mewahnya negara kita. Di sinilah rumah Tunggal. Malam itu, ramai kucing datang rumah Tunggal. Tunggal memberitahu mengapa mereka dijemput.

"Saya ingin menyerahkan kuasa kepada anda. Saya sudah tua. Jadi anda pilihlah sesiapa sahaja menjadi ketua menggantikan saya," jelas Tunggal. Mulai hari itu, kucing lain pula menjadi ketua. Sekarang Tunggal tidak ada kuasa. Apabila tidak ada kuasa, tidak ada lagi yang menghormati Tunggal.

Rumah Tunggal juga kini tidak dikunjungi oleh sesiapa. Tunggal tinggal kesunyian. Tunggal juga semakin uzur. Ia tidak berdaya hendak bergerak lebih jauh. Ia sering kelaparan kerana tidak ada makanan. Kucing-kucing lain tidak sudi menjengok lagi.

Pada suatu hari, Tunggal amat lapar. Sudah dua hari ia tidak makan. Badannya lemah dan panas. Tunggal tinggal dalam stor dekat bilik mayat. Tunggal berasa ia akan mati, jika tidak mendapat makanan. Sepanjang Tunggal diam di situ, ia selalu melihat ramai manusia yang mati. Ada yang mati kemalangan, mati akibat penyakit kencing manis atau mati berpenyakit lemah jantung. Semua manusia yang meninggal di hospital akan disimpan dalam bilik mayat sehinggalah dituntut oleh keluarga mereka.



"Aku pun mungkin akan mati tidak lama lagi," bisik Tunggal. Ia berjalan perlahan mendekati tingkap. Tunggal memerhati sekeliling. Ia ternampak banyak kepala udang galah. Kulit kepala udang itu ialah sisa makanan terbuang yang dibawa oleh pengikut-pengikut Tunggal sewaktu ia berkuasa dulu.

Tunggal memungut kulit kepala udang itu. Apabila semuanya terkumpul. Tunggal mengikatnya dengan tali rapia. Diperbuatnya seperti kalung. Kelihatan cantik kerana kulit kepala udang itu berwarna merah. Kalung kulit kepala udang itu rupa-rupanya dijadikan buah tasbih oleh Tunggal. Tunggal juga sekarang memakai jubah putih. Kepalanya dibelit dengan kain putih. Mukanya juga putih ditutup dengan kapas.

Dengan berpakaian begitu, Tunggal kelihatan seperti seorang wali. Sambil duduk mencangkung, Tunggal membilang buah tasbih sambil kepalanya tergeleng-geleng macam orang meratib. Pada suatu

hari, Tunggal menggagahi dirinya keluar dari bilik itu. Ia berdiri di tepi longkang sambil memerhati keliling. Tiba-tiba datang seekor tikus.

Tikus itu cedera di kaki.

Pada mulanya, tikus itu hendak lari apabila melihat Tunggal, tetapi Tunggal sempat memanggil tikus itu.

"Jangan lari! Saya bukan kucing jahat. Saya wali," jerit Tunggal.



"Anak sakit apa? Pak cik lihat macam luka parah," kata Tunggal lagi.

Tikus itu tidak jadi lari. Lagipun ia tidak berdaya hendak lari kerana pahanya luka parah. Tikus itu memerhati Tunggal. Ia lihat Tunggal seperti kucing

baik.

"Mari pak cik ubatkan. Jangan takut!" tambah Tunggal.

Tikus itu mendekati Tunggal. Ia ragu-ragu, tetapi apabila melihat Tunggal baik, ia percaya. Tikus itu menunjukkan lukanya.

"Oh, ini sikit sahaja! Nanti pak cik ubatkan." Tunggal mengambil sehelai kain pembalut luka yang terdapat dalam bekas sampah. Kain itu dibuang oleh pekerja hospital. Ubat kuning masih banyak terdapat pada kain itu. Setelah membalut luka itu, Tunggal menyuruh tikus itu masuk ke biliknya. Tikus itu mengikut sahaja kerana ia tidak larat hendak berjalan.

Dua malam tikus itu menumpang di bilik Tunggal. Sesudah kurang sakitnya, tikus memohon diri hendak pulang. Tunggal hanya tersenyum. Tikus itu pun keluar. Esok, tikus itu datang semula ke bilik Tunggal.

Kali ini ia membawa makanan untuk Tunggal.

"Makanlah pak cik!" kata tikus itu.



"Terima kasih, nak! Pak cik tolong bukan minta balasan. Pak cik tolong kerana kita sama-sama haiwan," kata Tunggal.

"Pak cik! Ibu saya luka parah kena paku. Boleh pak cik tolong ubatkan?" kata anak tikus itu.

"Boleh, saya cuba? Bawalah ke bilik pak cik," jawab Tunggal. Anak tikus itupun cepat-cepat pulang. Malam itu ia datang membawa ibunya. Ibunya luka di dada. Tunggal menggunakan ubat kuning untuk mengubat luka itu. Setelah dibalut, tikus itu pun

bermalam di situ. Pagi esok, mereka pulang. Seminggu kemudian tikus dua beranak itu datang lagi. Mereka cukup gembira kerana luka mereka sudah sembuh. Mereka tidak takut lagi pada Tunggal. Malah, mereka sering datang mengunjungi Tunggal sambil membawa makanan.

Sekarang Tunggal tidak sunyi lagi. Ia sudah ada kawan. Nama Tunggal juga semakin terkenal. Ia dipanggil Wali Kucing. Sudah banyak tikus yang sakit diubati oleh Tunggal. Kini tikus-tikus itu percaya kepada Tunggal. Tunggal dianggap 'Wali'. Tunggal kini sudah terasa jeratnya akan mengena. Ia begitu kepingin hendak merasa daging tikus. Sudah lama ia tidak makan daging tikus, tetapi ia tidak boleh bertindak bodoh.



Ia mesti kekalkan imejnya sebagai wali.

Pada suatu hari, Tunggal memberitahu tikus-tikus di kawasan itu supaya jangan mengunjunginya rumahnya selama seminggu.

"Saya akan pergi bertapa selama tiga hari tiga malam. Tuan-tuan jangan datang buat sementara waktu. Kalau ada apa-apa masalah, sila datang minggu depan," pesannya. Sebenarnya, Tunggal tidak pergi ke mana-mana. Ia hanya bersembunyi dalam sebuah kotak sabun. Ini hanya helahnya sahaja. Tunggal ingin menambah lagi keyakinan tikus terhadapnya.

Sekarang tikus-tikus itu begitu percaya kepada Tunggal. Tunggal pandai berlakon. Walau di mana ia berada dan dengan siapa Tunggal bercakap, ia sentiasa membilang tasbihnya. Tunggal kelihatan benar-benar warak. Seminggu kemudian, Tunggal keluar dari tempat persembunyiannya. Sekarang

Tunggal kelihatan lebih warak. Tubuhnya kelihatan lebih gemuk dan banyak bulu putih. Bulu itu ialah kapas. Tunggal menampal lebih banyak kapas di badannya.

"Saya pergi menambah ilmu. Kita hidup mesti banyak belajar. Banyak lagi yang kita tidak tahu. Kita mesti belajar sampai mati," kata Tunggal pada suatu pagi apabila dia dikunjungi. Seekor tikus tua turut serta dalam majlis itu. Ia ingin belajar ilmu dengan Tunggal. Lalu ia bertanya, "Bolehkah saya ikut belajar, Tok Wali?"